

孟河丁氏醫案

吳興

王震書

辛未孟春

孟河丁氏醫案

吳興王震書



馬序

丁甘仁先生孟河名醫也。孟河故醫學淵藪。而先生獨超。其再傳至濟萬君。箕裘弗替。衣鉢克承。以祖庭心法之所得。分門別類。列爲醫案。公諸當世。懸壺申江者有年矣。丁卯夏。僕漫游滬上。一見如故。名下無虛。察色觀豪。應手回春。斯固穎悟華淋。似飲上池之水。薪傳橘井。厭窺中古之書者矣。嗣出所輯思補山房醫案見眎。屬爲之序文。夫醫之爲術。濟世活人。而世往往視爲神祕。深隱莫測。如佛家之心印。道家之口訣。致使數千年之醫學。竟爾失傳。至如扁鵲華陀之流。史存其文。術亡其舊。於是西醫以解剖之精。研幾之審。起而代之。而中華醫術。勢將爲時代之落伍者。良可慨也。濟萬君有鑒於此。感喟而興。振乃祖之心得。付梨棗而遍觀。成一家之言。爲萬世之方。析疑辨難。矯末俗之膚受。苦心勤求。挽既失之國粹。此蓋爲耶之慈善。墨之博愛。而吾儒之所謂仁者愛人者也。甘仁先生後起有人。精靈萬古。於茲益信已。

丁卯嘉平月上浣日隴右馬福祥序



南京中医药大学图书馆版权所有

王序

古方書之見於著錄者。有長桑君之禁方。葛洪肘後救卒方。陶宏景補肘後救卒備急方。孫思邈之千金方。以及華陀漆葉青黏之散。素女玉機金匱之藏。片羽吉光。珍爲祕笈。蓋醫之有方。猶吏之有課。史之有評。詩之有品。書之有斷。於以考鏡得失。鈎稽利病。非徒垂空文以自見者比也。周禮醫師歲終則稽其醫事。以制其食。十全爲上。十失一次之。十失二又次之。十失三更次之。十失四爲下。所謂稽其醫事者。度亦去其方案。以驗其成績之良否耳。宋代編輯名方。頒行天下。郡國述時疫之狀。至爲纖悉。慶歷中。范文正達言。自京師以逮四方。學醫之人。皆聚而講習。以精其術。黜庸謬。拯生靈。倬然爲治道之助。其重視醫術。猶不失周禮之遺意。夫醫之爲道。至精且專。病者託其生命於醫師之手。呼吸之間。生死以之。故有不爲良相之喻。叔季以還。學術衰落。不獨於醫道然也。而脉不審。樞闔味不辨。咬咀昧帷中之十指。忘涪上之六微。形上也而形下眛之。陳陳相因。恬不爲怪。試過夫

一闕之市。彼家和緩而戶岐區者。上者浮光掠影。幸而有瘳。自矜首功。不幸而否。亦不任咎。若是者。其用心至巧。而其弋大名也。亦至速。下焉者。則直冥途摘埴。如大匠之操刀而割耳。苟有能著書立說。本其平日學識經驗所得。明詔當世。以共事切磋者。則且心折而目笑存之。然而卒亦不數數觀。蓋醫道之難能而可貴也。如此。余頻季客海上。習習聞丁甘仁先生之名。客夏舊患便血症大劇。鎮海金君雪塍語余。非求治於丁先生不可。因爲予言其處方治病事甚悉。乃驅車往訪。至則遇先生於門。蓋已日旰罷診矣。越數日而計至。匆匆一面。竟成千古。自悵求益之晚。嗣乞其文。孫濟萬診斷。不一月而所患若失。濟萬之學。一出先生。過從既數。輒因濟萬而思及先生。以未得親炙爲憾。一日。濟萬出所集先生方案示余。以墨首之文相屬。余受而讀之。恍若親承先生之緒論。證以金君所言。又往往而合。夙昔懷想。爲之大慰。夫醫非三世不專。非九折不精。先生之矯然自異。濟萬之恪守祖德。皆晚近所罕見。丁氏之以醫世其家也有以哉。昔扁鵲之治病也。飲藥三十

日。視見垣一方。與科學家之所謂愛格司光者。照人藏府。洞見癥結。將毋同。濟萬
虛中。劬學。鏤而不舍。行且媿美昔賢。甯止發揚家學。聊於此書。一發其凡。若夫先
生之勤味道腴。術擅活人。則精於醫者。類能道之。毋俟余之贅言云。
丁卯十有一月元吉西神王蘊章謹序於秋平雲室



夏序

醫何尙乎有案。案何尙乎有方。方者效也。案者斷也。案有理有法。窮其因。詳其證。而斷以治。方有君有臣。有正有反。有奇有偶。因其過。去其偏。而持乎平。平即治。治即愈矣。慨自長沙以降。名賢如鯽。著述之多。更僕難盡。至於今日。讀者不暇舉其名目。遑論其所說哉。卽其說也。亦復各持一端。善於此者毀於彼。主於此者奴於彼。而更句繁語疊。篇重簡複。片言可盡。累卷難窮。雖妙語如環。動人耳目。而清談徒尙。無補實用。論不能必其有用。用不能必其有效。徒使學者目眩耳迷。徘徊岐路。盡信書則不如無書。以有涯之生。致無窮之學。其不殆者寡矣。博以求約。信而有徵。則醫案是尙。蓋醫案之作。因證求因。以因求治。因治製方。以方觀效。其效也。如鼓應桴。其不效也。如日月之食。非可以空言搪塞。敷衍維持也。後之學者。按圖以索。亦步以趨。損益成法。錯縱新意。因規矩以成方圓。舉一隅而得三反。其用宏其效著矣。案之佳者。首推清代徐尤葉薛各有專精。宅誦家傳。奉爲鴻祕。惟精於

此者拙於彼。癖於補者難於攻。殆所謂專精易得。衆善難求者歟。甘仁丁先生。系出孟河。孟河固多名醫。先生耳目所及。取精拮華。益復上追古人。窮研至理。鎔古鑄今。內外兼善。蓋無病而不治。無治而不痊者也。懸壺海上。戶限爲穿。社會推爲良工。醫界讓爲巨擘。紹庭几席追陪。謬承知己。誼同昆季。進於友師。磨琢切磋。獲益無既。惜乎仁者不壽。先生遽歸道山。馬首難瞻。他山莫助。此紹庭所爲嘻吁流涕者也。乃者先生文孫濟萬。克承先志。收輯遺案。編訂成書。以資後學之觀摩。以作同道之借鏡。意至善也。辱承不棄。索序於余。慚余無學。不足以序先生。惟以爲醫案之關係醫道也如此其鉅。而先生之學問。爲紹庭所深知。則此編之有益於同道。於後學。蓋無待乎燭照數計而龜卜矣。是爲序。

丁卯年冬月應堂夏紹庭謹撰

王序

陰陽五行。參伍錯綜。迭相爲用。氣有偏勝。故理有扶抑。其間輕重疾徐。酌其盈。劑其虛。補其偏。救其弊。審察乎毫釐之際。批導乎卻窾之中。蓋憂乎其難哉。

先生以孟河宿學。爲歇浦良師。其根抵之深。經驗之富。固不待贅言。文孫濟萬來彙

先生遺案成帙。將壽諸棗梨。徵序於余。余笑曰。是殆以管蠡之見。窺天而測海也。雖然。余嘗與先生相會診。見其虛衷抑己。恒心折焉。今讀其所遺醫案。信乎先生之學。真能明陰洞陽。酌其盈。劑其虛。補其偏。救其弊。而有功於後學也。非根抵之深。經驗之富。其孰能與於斯。

丁卯十月 古歙王仲奇謹撰

曹序

予之得交甘仁先生也有年矣。先生嘗曰。道無術不行。昔固聞而疑之。竊謂江湖術士。有時自祕其長。以要人重幣。醫雖小道。爲病家生命所託。緩急死生。間不容髮。何處可用術者。先生曰。是有說焉。昔者卞和得良璞。獻之荆臺。楚王以爲燕石也。三獻不受。卒刖卞和之足。齊王好竽。雍門子抱琴立於王門。三年不得見。夫雍門子之琴。誠善矣。其如王之不好何。夫交淺言深。取信良難。况在死生存亡之頃。欲求速效。授以猛劑。則病家畏。素不相習。漫推心腹。則病家疑。疑與畏交相阻。雖有上工良劑。終以棄置不用。嗚呼。此亦荆臺之璞。王門之琴。卞和雍門子所爲痛心者也。聞古之善醫者。曰和曰緩。和則無猛峻之劑。緩則無急切之功。凡所以免人疑畏而堅人信心者。於是乎在。此和緩之所以名。卽和緩之所以爲術乎。先生之言如此。可以知所尚矣。嗟夫。自金元四家而後。各執仲景一偏。以相牴牾。異說蠡起。統系亡失。葉薛以來。幾於奄忽不振。先生愀然憂之。每當診治。規定六經綱

要輒思求合於古。故其醫案。胸痺用瓜蒌薤白。水氣用麻黃附子甘草。血證見黑色。則用附子理中。寒濕下利。則用桃花湯。濕熱則用白頭翁湯。陽明腑氣不實。則用白虎湯。胃家實。則用調胃承氣。於黃痺則用梔子柏皮。陰黃則用附子。雖劑量過輕。於重症間有不應。甚或連進五六劑。纔得小效。然此卽先生之道與術。所以免人疑畏者也。先生自去歲歸道山。文孫濟萬將舉而付之剗。問序於予。予率性倖直。甯終抱卞和之璞。雍門之琴。以待眞賞。於先生遺說。背負良多。爰略舉大凡。俾讀先生醫案者。得以考焉。

丁卯冬十一月。穎甫曹家達謹序。

曹家達

許序

半龍自畢業於中醫專校。卽束裝還蘆墟。乙丑春。丁師馳書相招。俾於廣益善堂施診。半龍自顧學識譾陋。惴惴如不勝。無何千頃堂書肆。索予外科學大綱。將以付之剞劂。予固不敢自信。因卽就正。丁師師慨然曰。予自寓滬以來。從遊者不下數百人。而於外科一道。研求者蓋寡。今是編行世。不獨爲吾門光。抑亦造福於病家者。殊匪淺鮮也。越日。丁師爲序文。辭意深摯。多所獎借。明年六月。半龍以避暑。暫歸鄉井。丁師卽於月杪謝世。嗚呼。可悲也已。今歲冬。文孫濟萬。將丁師外科醫案。屬爲參校。予性疏懶。請謁之日常少。丁師乃不以爲慢。而優容之。又從而褒許之。今幾日耳。深情厚貌。猶在目前。而丁師之墓草宿矣。然則予之不能已於言者。蓋不惟泰山梁木之悲。亦聊以存知己之感也。

丁卯十一月弟子許半龍敬書於中醫專校

陶序

昔者淳于意嘗自錄治驗。上之史氏。以示治病之要。乃後世醫案之嚆矢也。元明以降。此風大熾。而可傳之作。寥若晨星。迫于近今。更渺不可得。蓋駁雜而不醇。驗與不驗。不復計焉。而箴于海上。乃得丁師甘仁。師上追軒岐之奧旨。中發仲景之原理。晚得葉王之治法。實昏夜之燭。空谷之音也。惜以診務紛繁。席無暇暖。著作甚鮮。所存者惟醫案數卷而已。文孫濟萬世兄。繩武祖德。不忍見手澤之湮沒。校讎付刊。嘉惠後學。其功誠不淺而。吾師之作。自此傳矣。箴椎魯無文。不敢贊一辭。敬綴數言。聊誌景仰云爾。

丁卯季秋門人陶可箴謹序

秦序

丁卯冬仲。秉臣世兄輯錄。甘仁師醫案。問序于余。余再拜受之。今世之所謂名醫者。有三術焉。見病勢較重。卽多防變推諉之辭。爲日後愈則居功。變則諉過之地。此其一也。專選平淡和平之藥。動曰爲某方所增損。以博穩當之名。可告無罪于天下。此其二也。和顏悅色。溫語婉詞。動效奴僕之稱。求媚于婦女庸愚之輩。使其至死不悟。此其三也。三者之外。求見理明決。處方活潑。進而預定病勢之吉凶。先言愈期之早暮者。百不得一焉。乃舉世悠悠。孰分涇渭之日。于海上得。丁師甘仁。師于黃帝岐伯越人元化之書。旣多心得。而尤致力于仲景古訓。嘗謂醫有二大法門。一爲傷寒之六經病。一爲金匱之雜病。皆學理之精要。治療之準則。更旁及劉李朱張天士孟英輩。歷代專集。比擬攷求。發明其奧。蓋不以術豪。而獨以積學自高。宜其別病處方。展指上陽春。而沉寒忽散。潑壺中甘露。而元氣頓光。有若洞垣之照。大還之丹。孟瀆海濱。咸化爲春臺壽域矣。不幸去歲以微疾易簀。大

呂黃鍾正音遽寂。茫茫宇宙。大覺焉求。平居又以診務紛繁。著述鮮少。所存者僅喉科概要一卷而已。門生故舊嗟歎之餘。因倩文孫秉臣世兄邏輯歷年醫案。以資流傳。秉臣世兄宿承家學。臨診多時。其收集者。自當較同儕富且稽也。雖然。先大父又詞公以文學之暇。攻研醫籍。名被浦江東西。召樓奚丈鑄翁曾作讀內經圖贈之。迄今案養垂十載。鄉人士遇疾苦。猶有稱道之者。家藏醫案盈尺。余僅輯數十紙刊諸醫學雜誌。久欲付刊專集。未能償願。以視秉臣世兄之孝思。不禁又興手澤之悲矣。

門弟子上海秦之濟伯未甫敬撰

丁甘仁先生別傳

丁君甘仁歿後。予既據生平實錄。爲之撰述家傳。然先生良醫也。以先生之緒論。爲予所得聞者。及今不爲論次。後將無有知者矣。爲作別傳云。

甘仁先生既卒業於其鄉。初行道於蘇州。無所合。復東行之海上。乃大行。既而聞業於汪蓮石。汪令治傷寒學。於舒氏集注。最有心得。由是凡遇難證。輒先規定六經。然後施治。嘗謂腦疽屬少陰。發背屬太陽。皆不當誤投寒涼。此其大較也。又善易理。嘗語予曰。夏至一陰生。易象爲姤。嗣是陰氣漸長。中陽漸虛。陽散於外。陰守於內。設持循而不亂。足以抵禦天陽。當無暑熱之病。設或過於飲冷。中陽不支。乃有洞泄寒中。及寒霍亂諸證。予因是悟附子理中及通脉四逆方治。冬至一陽生。易象爲復。嗣是陽氣漸長。裏陰漸薄。陰寒在外。伏陽在內。設固悶而不耗。足以抵禦寒氣。則必無傷寒重證。惟妄爲作勞。陰液散亡。陰不勝陽。乃有冬溫之病。予是以悟少陰有大承氣及黃連阿膠方治。予曰。善。先生於治病方藥。知無不言。言無